

Qishloq hayoti

O'zbekiston Respublikasi ijtimoiy-iqtisodiy gazetasi

2021-yil 7-yanvar, payshanba 1 (9112)-son

e-mail: info@qishloqhayoti.uz

Фаргона вилояти

ТАДБИРКОР ТОШДАН ҚОҒОЗ ИШЛАБ ЧИҚАРАДИ

Асли касби шифокор-жарроҳ Абдурахмон Ниёзов 20 йилдан буён тадбиркорлик фаолияти билан шуғулланади. Эътиборлиги, у янгиликлар яратишдан чарчамайди.

Тадбиркорнинг тошдан қоғоз ишлаб чиқариш лойиҳаси нафақат республикамизда, балки Марказий Осиё минтақасида ҳам ягонадир. Умуман олганда, Ўзбекистон тошдан қоғоз ишлаб чиқариш бўйича Хитой, Тайван, Эрон ва Япониядан кейинги бешинчи давлат саналади. Хитойлик ҳамкорлар кўмагида барпо этилган “Фаргона тош қоғоз” масъулияти чекланган жамияти январь ойида ишга туширилади.

– Президентимизнинг 2019 йил 5-6 май кунлари Фаргона вилоятига ташрифи чоғида мазкур лойиҳани тақдим этган эдик, – дейди Абдурахмон Ниёзов биз билан суҳбатда. – Корхона йилига 9000 тонна ёки 9 миллион долларлик қоғоз ишлаб чиқариш қувватига эга. Юртбошимиз нафақат Фарғонада, балки мамлакатимизнинг барча ҳудудларида шундай лойиҳани амалга ошириш юзасидан кўрсатма берди. Айна пайтда юртимизга 550 мил-

лион долларлик қоғоз импорт қилинаётган бўлса, Қорақалпоғистон Республикаси, вилоятлар ва пойтахтимизда бу лойиҳа амалга оширилса, импорт ҳажми сезиларли даражада камаяди. Ҳозирда Хитойнинг “GX-Tech” компаниясининг 4 нафар мутахассиси йиғиш-бутлаш, технологияни ишлатиш ва бошқа муҳим жиҳатларини бизга ўргатмоқда. – Мана икки ойдириқ, Фарғонадами, – дейди гуруҳ сардори, муҳандис-конструктор Жао



Жин Ганг. – Юртингизда яратилган тадбиркорлик ва ишбилармонлик муҳити таҳсинга лойиқ. Қолаверса, ўзбек халқининг меҳмондўстлигидан бағоят миннатдоримиз. Айниқса, ҳар бир иш бошида яхши ниятлар билан дуо қилиниши менинг эътиборимни тортди. Фурсатдан фойдаланиб,

Ўзбекистон аҳлини кириб келган Янги йил билан қутлайман. Шунингдек, ишлатилган бўёқнинг ранги умуман ўчмайди. Фарғона қоғози экологик тоза, кўш ва сувга чидамли ҳамда ёғ ва доғлар юқмайдиган маҳсулот бўлади. Айниқса, матбаачилик соҳаси учун жуда фойдали хомашё саналади. Матбуот нашр-

ларини чоп этишда бўёқ сарфи камаяди. Шунингдек, ишлатилган бўёқнинг ранги умуман ўчмайди. Бундан ташқари, тош қоғозидан гипсокартон, гулқоғоз ва арқон ишлаб чиқаришда ҳам фойдаланилади. **Муқимжон ҚОДИРОВ (ЎЗА) олган суратлар.**

ЎЗБЕКИСТОН РЕСПУБЛИКАСИ ОЛИЙ МАЖЛИСИ СЕНАТИНИНГ ЎН БИРИНЧИ ЯЛПИ МАЖЛИСИ Тўғрисида АХБОРОТ

2021 йил 6 январь куни Тошкент шаҳрида Ўзбекистон Республикаси Олий Мажлиси Сенатининг ўн биринчи ялпи мажлиси бўлиб ўтди. Видеоконференцалоқа тарзида ўтказилган ялпи мажлисда ҳукумат аъзолари, вазирлик ва идоралар раҳбарлари ҳамда оммавий ахборот воситалари вакиллари иштирок этди.

Ялпи мажлисни Ўзбекистон Республикаси Олий Мажлиси Сенати Раиси Танзила Норбоева олиб борди. Мазкур ялпи мажлис иши Сенатнинг расмий веб-сайти ва ижтимоий тармоқлардаги саҳифалари ҳамда “O'zbekiston-24” ва “Uzgerolp” телеканаллари орқали тўғридан-тўғри жонли эфирда намоиш этилди.

Сенат аъзолари томонидан 5 та масала, шу жумладан, 3 та қонун муҳокама қилинди.

Ялпи мажлисда сенаторлар дастлаб Ўзбекистон Республикаси Президенти Шавкат Мирзиёевнинг Олий Мажлисга Мурожаатномасида белгиланган устувор вазифалар тўғрисидаги масалани кўриб чиқди.

Таъкидланганидек, Президентимиз Олий Мажлисга йўллаган Мурожаатномасида ўтган йилда амалга оширилган ишлар, эришилган натижалар ҳамда бу йилги вазифалар тўғрисида атрафлича тўхталиб ўтди. Айниқса, 2020 йилда пандемия ва бошқа табиий офатлар сабабли юзага келган мураккаб шароитга қарамайдан, қатор халқаро ташкилотлар баҳосига кўра Ўзбекистоннинг жаҳон миқёсида ижобий ўсишни сақлаб қолган камдан-кам давлатлар қаторида жой олгани аҳамиятга молик.

Шу маънода айтиш мумкинки, Мурожаатномада Президентимиз давлат ва жамиятни янада ривожлантириш билан боғлиқ энг асосий йўналишлар, барча даражадаги давлат ҳокимияти ва бошқаруви органлари, хусусан, Олий Мажлис юқори палатасининг қатор устувор вазифаларини белгилаб берди.

Мурожаатномада келтирилган чора-тадбирларнинг ҳуқуқий асосларини яратиб бериш, барча соҳаларда қонун устуворлигини, қабул қилинаётган ҳужжатларнинг, айниқса, бюджет (республика ва маҳаллий) бажарилишини жойларда сўзсиз ижросини таъминлаш бўйича парламент томонидан самарали назорат ўрнатиш, уларнинг тўлиқ бажарилишига эришиш асосий вазифалардан биридир.

Қайд этилганидек, мазкур вазифаларнинг жойлардаги ижроси Сенатнинг тегишли кўмиталари, қолаверса, ҳудудлардаги ҳар бир сенатор ва маҳаллий Кенгашларнинг диққат марказида бўлиши керак.

Жумладан, Болаларни қўллаб-қувватлаш жамоат фонди фаолиятини қонун даражасида мустаҳкамлаш ҳамда Болалар омулдсмани тўғрисидаги қонунни ишлаб чиқиш бўйича фаол иш олиб бориш зарур.

(Давоми 2-саҳифада)

АФҒОНИСТОН ИСЛОМ РЕСПУБЛИКАСИ ДЕЛЕГАЦИЯСИ ЎЗБЕКИСТОНДА

Афғонистон Ислам Республикаси Жамоат саломатлигини сақлаш вазирлигининг масъул ходимлари ва шифокорларидан иборат делегация юртимизда бўлиб турибди.

Бугун Ўзбекистон Республикаси соғлиқни сақлаш вазири Абдуҳаким Ҳожибоев Афғонистон Ислам Республикасининг юртимиздаги Фавкуллода ва мухтор эгачиси Аҳмад Халид Элмий ва делегация аъзоларини қабул қилди.

Мулоқот давомида таъкидланганидек, 2017 йилнинг декабрь ойида Афғонистон Ислам Республикаси Президенти Ашраф Ғанининг Ўзбекистонга ташрифи давомида икки давлат ўртасида узоқ муддатли истиқболда ҳамкорликни ривожлантиришнинг устувор йўналишлари белгилаб олинган эди.

Шунингдек, ушбу ташриф доирасида Ўзбекистон Соғлиқни сақлаш вазирлиги ва Афғонистон Жамоат саломатлигини сақлаш вазирлиги ўртасида англашув меморандуми ҳам имзоланганди.

2018 йилда давлатимиз томонидан Афғонистон “Тез ёрдам” хизмати учун 5,7 миллион доллар қийматидаги 100 дондан ортиқ автомобиль етказиб берилди. Шу йили Тошкент давлат стоматология институти ва Қобул тиббиёт университети ўртасида ҳамкорлик келишуви имзоланди. Ҳозир афғонистонлик талабалар Тошкент давлат стоматология ҳамда Андижон давлат тиббиёт институтларида таҳсил олмоқда.

Шунингдек, афғонистонлик шифокорлар Тиббиёт ходимларининг касбий малакасини ошириш маркази, Сурхондарё вилояти кўп тармоқли тиббиёт маркази ҳамда шошилинч тиббий ёрдам хизмати тизимида малака оширмоқда.

Икки давлат ўртасида фармацевтика тармоғини ривожлантириш соҳасида ҳам қатор ҳамкорлик дастурлари амалга ошириб келинмоқда. Хусусан, 2019 йилда Ўзбек-афғон ишбилармонлар форуми ва семинари ўтказилди. Афғонистонда Ўзбекистоннинг фармацевтика ва тиббиёт маҳсулотлари ва тиббий техникасини экспорт қилиш учун Ўзбек-афғон савдо уйини очиб борасида ишлар олиб борилмоқда. 2020 йил давомида юртимизнинг фармацевтика тармоғи корхоналари томонидан 2,4 миллион доллар қийматидаги маҳсулотлар Афғонистонга экспорт қилинган.

Мулоқот давомида Аҳмад Халид Элмий Ўзбекистон коронавирал инфекцияси тарқалишининг олдини олиш, уни даволаш соҳасида катта тажриба тўлагани, ушбу тажрибани ўрганиш ва ўз давлатида татбиқ қилиш афғонистонлик шифокорларнинг олдида турган муҳим вазифалардан бири эканлигини таъкидлади. Абдуҳаким Ҳожибоев икки давлат ўртасида соғлиқни сақлаш соҳасидаги ҳамкорликни янги bosқичга олиб чиқиш, ривожлантириш ва зарур бўлган амалий кўмакни беришга тайёр эканини билдирди.

Эслатиб ўтамиз: делегациянинг юртимизга келишидан мақсад коронавирал инфекцияси профилактикаси, тарқалишининг олдини олиш, диагностикаси ва даволашнинг Ўзбекистон тажрибасини ўрганиш, “COVID-19”ни даволашнинг замонавий ва самарали усулларини қўллаш бўйича шифокорларнинг амалий кўникмалари ва малакасини оширишдан иборатдир. Ўн кун давомида 20 нафар афғонистонлик мутахассисдан иборат делегация улар учун махсус ташкил этилган ўқув машғулотида иштирок этди.

ЎЗА

Сирдарё вилояти

ХОВОС ҲАВАСЛИ ШАҲАРЧАГА АЙЛАНДИ

Сўнгги йилларда Ховос шаҳарчаси кўркам ва замонавий гўшалардан бирига айланди. Бугун Ховос шаҳрини кўрган кишининг ҳаваси келади.

(Давоми 2-саҳифада)



Наманган вилояти

Ўтган йилни уйчиликлар барча соҳаларда арзигулик натижалар билан яқунлади. Чекка маҳаллалардан то туман марказигача ободлик, фусункорлик касб этди. Кўчалар, гузарлар, боғу хийбонлар гулу гулзорларга бурқанди.

Айниқса, қишлоқ хўжалигида залворли одимлар қўйилди. Пахтачилик, ғаллачилик, пиллачилик, боғ-ползичилик, парандачилик, балиқчилик йўналишларида режалар ортиси билан удаланди. Шу боис ҳам туман меҳнаткашлари 2021 йилни кўтаринки кайфият, шоду хуррамлик, янги режа, улғу мақсадлар билан кутиб олдилар.

Барвақт ҳаракат – баракат

– Барвақт ҳаракат ҳар ишда берар бракат, деган нақл бежиз айтилмаган, – дейди туман ҳокими Муҳаммадаюбхўжа Апақов. – Янги йилнинг илк куниданоқ қиш фасли юмушларини жонлантирибгина қолмай, баҳорги экиш мавсумига тайёрларини кизгин бошлаб юбордик. “Уйчи агросервис” МТП МЧЖга барча техникалари жамланди. Уларга хизмат кўрсатувчи чилангар ва механизаторларга ишлаши, овқатланиши, дам олиши учун зарур шарт-шароитлар яратиб берилди. Сифатли иш бажарган, техникани кўрик чиғиғига барвақт тайёрлаган илгорлар рағбатлантириб борилди. Шу кунгача 130 та чолиқ трактори ва культиватор, 80 та чигит экиш, 65 та пушта олиш мосламаси, 380 та борана ва бошқа зарур жиҳозлар сифатли таъмирдан чиқарилди.

Ҳақиқатдан ҳам туманда амалга оширилаётган бугунги



кун юмушларининг кўлами ва сифатидан кўнгил тўлади. Равадон чопилган ариқ, зовурлар сув таъминотидаги муаммоларга барҳам берса, “Агроки-мехимоя” ХАЖ туман филиали марказий биологаториясида трихограмма, олтинкуз, габроброн маҳсулотлари ишлаб чиқаришни янада кўпайтириш йўлидаги сайъ-ҳаракатлар, қўшимча иккинчи марказий

биологаториянинг ишга туширилгани деҳқон ва фермерларга ҳосилдорлиқни ошириш имкониятларини очиб беради. Тумандаги “Тола” фермер хўжалигида ўтган йили 19 гектар майдонга томчилатиб сўғориш усули қўлланилиб ҳар гектар ҳисобига 42 центнердан хирмон кўтарилгани, жорий йилда яна 20 гектарга бу усулнинг тадбиқ этилиши режалаштири-

лаётгани, “Матлуба фарзандлари Шокирбек ва Собирбек” фермер хўжалигида мўл-кўл ғалла етиштириш борасидаги бой тажрибалар барча фермер хўжалиқларида тadbик этилиши йўлга қўйилаётгани ҳам эътирофга лойиқ.

Янги йилнинг биринчи ҳафтасида вилоят ҳокими Шавкатжон Абдуразақов бошчилигидаги соҳага дахлдор мутасадди ташкилотлар раҳбарлари туманда бўлди. Автобусларда худудларни айланмоқ, қишлоқ хўжалигида амалга оширилаётган тадбирлар кўлами, сифати, кўкламга қандай ҳозирлик кўрилатганига баҳо беришди. Йўл қўйилаётган камчиликлар рўй-рост айтилди. Ўзаро тажрибалар алмашилди. Яхши ният билан худудда фаолият кўрсатиб келаётган дон ва дуккакли экинлар илмий-тадқиқот институти Наманган илмий-тажриба станциясида жонлиқ сўйилиб, ош тортилди. Фахрийлар юртимиз тинч, осмонимиз мусаффо, деҳқончилигимиз баракали келишини Яратгандан сўраб, дуо қилдилар.

Равшанбек МИРЗОЛИМОВ, “Qishloq hayoti” муҳбири.

(Боши 1-саҳифада)

Шу билан бирга, камбағалликни қисқартириш борасида комплекс ёндашув ва но-стандарт усулларни жорий этишга алоҳида эътибор қаратиш, Сенатнинг тегишли қўмитаси ва Сенат девонининг масъул таркибий бўлинмалари билан биргалликда ушбу вазифани амалга ошириш бўйича таклифлар ишлаб чиқиш лозим.

Хусусан, маҳаллий Кенгашлардаги депутатлик корпуси билан бирга аҳолини ижтимоий қўллаб-қувватлаш бўйича амалга оширилаётган ишларни манзилли ўрганиб бориш мақсадга мувофиқ.

Яна бир жиҳат. Мурожаатномада Давлат харидлари соҳасини такомиллаштиришга алоҳида эътибор қаратилди. Ўз ўрнида, давлат харидлари устидан назоратни олиб боришда жамоатчилик билан ҳамкорликда ишлаш, унинг фикрини инобатга олиш механизмларини жорий қилиш керак. Қолаверса, бу каби долзарб масалалар юзасидан Коррупцияга қарши курашиш агентлиги билан ўзаро ҳамкорликни кучайтириш муҳим. Масъулларнинг ҳисоботларини эшитишда Мурожаатномада белгиланган вазифалар ижросига алоҳида эътибор қаратиш зарур.

Бундан ташқари, мажлисда Сенатнинг Оролбўйи минтақасини ривожлантириш масалалари қўмитаси парламент назоратини маҳаллий ва республика даражасида олиб бориши, жумладан, Жўқорғи Кенгес ва Сенат Кенгашида эшитувлар ташкил қилиш, парламент сўровларини юбориш, жойларда депутатлик ва сенаторлик ўрганишларини ташкил қилиши лозимлиги таъкидланди.

Шунингдек, қийноқларнинг олдини олиш бўйича Омбудсман ваколатларини кенгайтириш, мазкур йўналишда жамоатчилик назоратини кучайтириш юзасидан тегишли таклифлар ишлаб чиқиш, бу борадаги ўрганишлар ва таҳлилларни янада кучайтириш муҳим аҳамият касб этиши қайд этилди.

Мажлисда таъкидланганидек, жорий йилда Суд ҳокимияти мустақиллигини таъминлашга кўмаклашувчи комиссияга раислик қилиш Сенатга ўтади. Шу боис, Комиссия фаолиятини янада кучайтириш энг долзарб вазифалардан бири ҳисобланади.

Қолаверса, Сенатнинг тегишли қўмитаси мамлакатимиз ташқи сиёсатининг устувор йўналишларига ҳам алоҳида аҳамият қаратиши, ўзига вазифаларни белгилаб олиши тўғрисида тўхталиб ўтилди.

Ўтган йилдан бошлаб халқро муносабатлар йўналишида Сенатда янги, яъни Ўзбекистоннинг хорижий давлатлардаги элчилари ҳисоботини эшитиш амалиёти жорий этилган эди. Шундан келиб чиқиб, биринчи навбатда жорий йилда Ўзбекистоннинг Россия, Хитой, Америка Қўшма Штатлари, Туркия, Германия, Франция, Буюк Британия, Жанубий Корея, Япония, Ҳиндистон, Покистон, Бирлашган Араб Амирикларидидаги элчиларининг фаолияти тўғрисидаги ҳисоботлари эшитувини ташкил қилиш лозим. Ушбу мамлакатлар билан парламентлараро муносабатларни ривожлантириш, Ўзбекистонга чет эл инвестицияларини жалб этиш, туризмин ривожлантиришга оид аниқ чораларни ишлаб чиқиш ва амалга ошириш мақсадга мувофиқ.

Мурожаатномада маҳаллий Кенгашлар фаолиятига доир бир қатор масалаларга ҳам алоҳида тўхталиб ўтилгани, қўллаб-қувватлаш халқ вакилларига берилаётгани таъкидланди.

Шу боис маҳаллий Кенгашлар жорий йил-

ЎЗБЕКИСТОН RESPUBLIKASI OLIY MAJLISI SENATINING ЎН БИРИНЧИ ЯЛПИ MAJLISI TЎGRISIDA AXBOROT

да бугунги кунгача маҳаллий давлат бошқаруви органлари раҳбарларининг ҳисобот ва ахборотларини эшитиб бориш, маҳаллий бюджет ижросига масъулият билан ёндашиш, ҳар бир туман ва шаҳарда камбағалликни қисқартириш бўйича ишлаб чиқиладиган манзилли дастурнинг ижроси бўйича ҳисоботни эшитиб, муҳокама қилиб бориш, “темир дафтар”, “аёллар дафтари”, “ёшлар дафтари” бўйича чора-тадбирлар дастурларининг ижросига жиддий эътибор қаратиш, ҳар бир депутат ўзи сайланган ҳудуд аҳолиси, сайловчилари билан бевосита мулоқотни йўлга қўйиши, муаммоларни ҳал этишга кўмаклашиши зарурлиги тўхталиб ўтилди.

Яна бир жиҳат. Мурожаатномада Сенат Раиси раҳбарлигида Республика Хотин-қизлар жамоатчилиги кенгашини ташкил этиш лозимлиги белгилангани, мазкур Кенгаш мамлакатимизда хотин-қизларнинг жамиятдаги ва давлат бошқарувидаги мавқеини янада оширишга қаратилган яхлит тизим яратишга масъул бўлиши, Кенгашнинг асосий вазифаси жамиятда аёллар мавқеини ошириш, уларнинг муаммоларини пухта ўрганиш, хотин-қизларни қийнаётган қўллаб-қувватловчи-иқтисодий муаммоларга амалий ечим топиш, уларни “темир дафтар” ва “аёллар дафтари”дан чиқаришга кўмак бериши билдирилди.

Сенатнинг масъул қўмитаси мазкур вазифаларнинг самарали амалга оширилиши, жумладан, Кенгашнинг низоми, вазифалари, ишлаш тартиби ва иш режалари шакллантирилишини мувофиқлаштириб бориш лозимлиги қайд этилди.

Мажлисда Мурожаатноманинг мазмун-моҳияти, аҳамияти ва долзарблигидан келиб чиқиб, давлатимиз раҳбари томонидан белгиланган устувор вазифаларни амалга ошириш бўйича Сенатнинг Ҳаракатлар дастурини ишлаб чиқиш мақсадга мувофиқлиги таъкидланди.

Шу маънода, Сенат Раиси ўринбосари раҳбарлигида Ишчи ғуруҳ тузилиб, Ҳаракатлар дастури лойиҳасини ишлаб чиқиши кераклиги билдирилди.

Мазкур масала юзасидан Олий Мажлис Сенатининг тегишли қарори қабул қилинди.

Сўнгра Сенат аъзолари “Ўзбекистон Республикасининг Конституциясига ўзгартишлар киритиш тўғрисида”ги Ўзбекистон Республикаси Қонуни муҳокама қилди.

Қайд этилганидек, давлатимиз раҳбари ташаббуси билан мамлакатда қонун устуворлигини таъминлаш, фуқароларнинг конституциявий ҳуқуқларини рўёбга чиқариш ва жамиятда адолатни қарор топтиришда одил судлов алоҳида ўрин тутишини эътиборга олган ҳолда сўнги тўрт йилда суд-ҳуқуқ соҳасини тубдан ислоҳ этишга қаратилган кенг қамровли ҳуқуқий-ташкилий чора-тадбирлар амалга оширилди.

Суд-ҳуқуқ соҳасида йиллар давомида ечим топмаган муаммолар масалаларини ҳал қилиш борасида Президентимизнинг ўндан ортқ фармон ва қарорлари ҳамда парламент томонидан одил судлов сиёсати ва самарадорлигини оширишга қаратилган учта кодекс янгидан қабул қилиниб, қатор қонунларга тегишли ўзгартиш ва қўшимчалар киритилди.

Қайд этиш жоизки, мазкур Қонун мамлакатимизда амалга оширилаётган суд-ҳуқуқ ислохотларининг мантиқий давомидир. Хусусан, Ўзбекистон Республикаси Президентининг 2020 йил 24 июлдаги “Судлар фаолиятини янада такомиллаштириш ва одил судлов самарадорлигини оширишга доир қўшимча чора-тадбирлар тўғрисида”ги фармони суд-ҳуқуқ ислохотларининг янги босқичини амалга оширишнинг ҳуқуқий асосини яратди.

Мазкур фармоннинг ижросини таъминлаш мақсадида ишлаб чиқилган қонунга асосан суд қарорларининг қонунийлиги, асослиги ва адолатлигини қайта кўриб чиқиш тартибини илғор хорижий тажрибадан келиб чиққан ҳолда такомиллаштириш, фуқаролар учун одил судловга эришиш имкониятларини кенгайтириш мақсадида суд тизимида 2021 йил 1 январдан бошлаб:

вилоят ва унга тенглаштирилган фуқаролик ишлари бўйича, жиноят ишлари бўйича судлар ва иқтисодий судлар негизига судьяларнинг қатъий ихтисослашувини сақлаб қолган ва суд ишларини юритиш турлари бўйича алоҳида судлов ҳайъатларини ташкил этган ҳолда Қорақалпоғистон Республикаси, вилоятлар ва Тошкент шаҳар умумюрисдикция судларини ташкил этиш;

маъмурий тартиб-таомиллар ва бошқа оммавий ҳуқуқий муносабатлардан келиб чиқадиган ишларни кўришга ихтисослаштирилган Қорақалпоғистон Республикаси, вилоятлар марказалари ва Тошкент шаҳрида туманларо маъмурий судларини ташкил этиш, шу муносабат билан туман (шаҳар) маъмурий судларини тугатиш. Бунда Қорақалпоғистон Республикаси, вилоятлар ва Тошкент шаҳар маъмурий судлари сақлаб қолиниши назарда тутилган.

Шуларга асосан суд тизимида ташкилий-тузилмавий ўзгаришлар амалга оширилаётганлигини инобатга олиб, Ўзбекистон Республикаси Конституциясининг 107-моддасига тегишли ўзгаришлар киритилмоқда.

Мазкур қонуннинг ҳаётга татбиқ этилиши суд тизимини бошқариш масалаларининг такомиллаштирилиши, вилоят ва унга тенглаштирилган судларни ташкилий, молиявий ва моддий-техник жиҳатдан таъминлашга эришиш билан бир қаторда, энг аввало, фуқароларнинг судма-суд сарсон бўлиб юришига барҳам бериб, уларнинг муаммосининг бир жойда ҳал қилиниши имконини беради.

Қонун сенаторлар томонидан маъқулланди.

Шундан сўнгра “Ўзбекистон Республикасининг Шаҳарсозлик кодексини тасдиқлаш ҳақида”ги Ўзбекистон Республикаси Қонуни муҳокама марказида бўлди.

Таъкидланганидек, мамлакатимизда тadbirkorлик субъектларини қўллаб-қувватлашнинг замонавий бозор механизмларини жорий этиш, уларнинг ҳуқуқлари ва қонуний манфаатлари қаролатларнинг барқарорлигини таъминлаш ва кучайтириш, инвестиция ва замонавий технологияларни жалб қилиш юзасидан бир қатор чора-тадбирлар қўрилмоқда.

Шу билан бирга, қурилиш соҳасидаги ишлар ҳолатини ўрганиш ушбу соҳада

ислохотларни жадал амалга оширишга ва соғлом рақобат муҳитини ривожлантиришда муаммолар борлигини кўрсатди.

Қайд этиш жоизки, ушбу муаммолар қурилиш соҳасига инвестицияларни жалб қилиш учун қўлай шарт-шароитлар яратиш, қурилиш тармоғи кадрларини профессионал тайёрлаш, қайта тайёрлаш ва уларнинг малакасини ошириш тизимининг самарадорлигига тўқнаш қилмоқда.

Шу боис, “Ўзбекистон Республикасининг Шаҳарсозлик кодексини тасдиқлаш ҳақида”ги қонун ишлаб чиқилган.

Шаҳарсозлик кодексига “аҳоли пункти”, “шаҳар”, “шаҳарча” ва “кишлоқ (овул)” объекти турлари, “ўзбошимчилик билан қурилиш қилиш”, “урбанизация” тушунчалари, шаҳарсозлик фаолиятида фуқаролар муҳокамаси иштироки ва бошқа ибораларга тушунчалар берилмоқда.

Шунингдек, Кодексда норматив-техник ҳужжатларни жорий этиш ва уларнинг ҳисобини юритиш бўйича янги нормалар мустаҳкамланмоқда. Яъни:

– шаҳарсозлик фаолияти соҳасидаги қарорларнинг муҳокамасида жамоатчилик назоратининг иштирокини таъминлаш;

– юридик ва жисмоний шахсларга етказилган зарарнинг ўрни қопланишининг асосий йўналишларини белгилаб берадиган янги норма;

– пудрат учун давлат шартномасини ишлаб чиқиш ва тузиш тартиби ва пудрат ишлари қатъий шартнома асосида амалга оширилиши;

– шаҳарсозлик ҳужжатларини экспертизадан ўтказишда экспертларнинг ҳуқуқлари ва жавобгарлиги кўрсатилган.

Ўз ўрнида, мазкур Кодексда қурилиш материаллари, буюмлари ва конструкцияларига қўйиладиган талаблар акс эттирилиб, уларга асосан шаҳарсозлик фаолиятининг молиявий таъминоти, суғурталаш ва шаффофликни таъминлаш, шу жумладан, қурилишда суғурталаш, шунингдек, шаҳарсозлик тўғрисидаги қонун ҳужжатларини бузганлик учун жавобгарлик белгиланди.

Сенаторлар томонидан таъкидланганидек, мазкур нормаларнинг белгиланиши соҳада бюрократик тўсиқларни бартараф этиш, аҳоли пунктларининг бош режаларини ишлаб чиқиш ва тасдиқлаш ҳамда шаҳар чегараларини аниқлашнинг янги қонуний асосларини яратди.

Хусусан, шаҳарсозлик нормалари ва қоидалари ишлаб чиқишлигининг тартиби, муддатлари ва уларнинг йўналишлари белгиланиши, рақобатни ривожлантириш орқали инвестиция муҳити яхшиланиши, шаҳарсозлик соҳасида жамоатчиликнинг кенг иштироки, атроф-муҳит муҳофазаси ва аҳолининг соғлигини асраш, яшаш ва фаолият муҳитини шакллантиришнинг комплекс шароитларини белгилашга имкон яратиши таъминланади.

Энг асосийси, жамият ва давлатнинг, юридик ва жисмоний шахсларнинг, шу жумладан, тadbirkorлик субъектларининг манфаатларини амалиётда ифодалаш ва ҳимоя қилиш механизми яратилади. Аҳоли пунктларининг архитектура қиёфасини яхшилаш ва аҳоли-

нинг турмуш даражасини кўтариш имконияти вужудга келади.

Хулоса ўрнида қайд этиш жоизки, мазкур Кодекс қурилиш фаолиятини янада такомиллаштиришга йўналтирилган.

Сенат аъзолари ушбу қонунни маъқуллади.

Шундан сўнгра “Маданий фаолият ва маданият ташкилотлари тўғрисида”ги Ўзбекистон Республикаси Қонуни муҳокама қилинди.

Таъкидланганидек, бугунга қадар маданият соҳасидаги ҳуқуқий муносабатлар “Маданий бойликларнинг олиб чиқилиши ва олиб қилиниши тўғрисида”ги, “Музейлар тўғрисида”ги, “Маданий мерос объектиларини муҳофаза қилиш ва улардан фойдаланиш тўғрисида”ги қонунлар ҳамда Ўзбекистон Республикаси Президентининг қатор фармон ва қарорлари, қолаверса, бошқа қўллаб-қувватловчи ҳужжатлари билан тартибга солиб келинаётган эди.

Маданият соҳасидаги муносабатларни тартибга солиш, маданият ва санъат муассасалари, ижодий уюшма ва бирлашмаларнинг ҳуқуқий мақоми, ижодкорларни ижтимоий ҳимоя қилишга қаратилган ягона ҳуқуқий база яратилмагани турли эътирозларга сабаб бўлаётганди. Бунга жавобан “Маданий фаолият ва маданият ташкилотлари тўғрисида”ги қонун соҳадаги ҳуқуқий бўшлиқни тўлдирishга ҳизмат қилади.

Қонунда маданият соҳасида давлат сиёсатининг мақсади ва асосий устувор йўналишларини белгилаш, мазкур йўналишдаги ҳуқуқий муносабат иштирокчиларини аниқлаш ва уларнинг ваколатларини белгилаш, истеъдод эгалари ва маданият муассасаларининг ҳуқуқий мақоми белгилаш, маданият ташкилотларини давлат ҳокимияти органлари, маҳаллий ўзини ўзи бошқариш органлари ва бошқа ташкилотлар билан ўзаро алоқа ва ҳамкорлигини такомиллаштириш, маданият тармоқларининг рақобатбардошлигини ошириш ва бошқа қатор муҳим масалалар қамраб олинмоқда.

Вазирлар Маҳкамаси, Маданият вазирлиги, Ўзбекистон Республикаси Президенти Администрацияси ҳузуридаги Ахборот ва оммавий коммуникациялар агентлиги, “Ўзбекино” миллий агентлиги ҳамда маҳаллий давлат ҳокимияти органлари маданий фаолият соҳасидаги давлат сиёсатини рўёбга чиқаришни амалга оширувчи органлар сиёсатида кўрсатилиб, уларнинг ваколатлари белгиланмоқда.

Қонуннинг қабул қилиниши маданият соҳасидаги муносабатларни ҳуқуқий тартибга солиш самарадорлигини оширади ҳамда халқро ҳуқуқ нормаларини миллий қонун ҳужжатларига имплементация қилинишини таъминлайди.

Шунингдек, халқро майдонда Ўзбекистон Республикасининг имижини ошириш билан бир қаторда халқлар ва минтақалар ўртасидаги маданий алоқаларнинг янада ривожланиши ва мустаҳкамланишига ўзининг ижобий таъсирини кўрсатади.

Қонун сенаторлар томонидан маъқулланди.

Ялпи мажлисда Олий Мажлис Сенати Кенгашининг қарорлари ҳам тасдиқланди.

Шу билан Ўзбекистон Республикаси Олий Мажлиси Сенатининг ўн биринчи ялпи мажлиси ўз ишини якунлади.

**Ўзбекистон Республикаси
Олий Мажлиси Сенати
Ахборот хизмати**

(Боши 1-саҳифада)

Ховос туманидаги бунёдкорликни чиндан ҳам катта бир мўъжизага қиёслаш мумкин. Кун сайин ўзгариб бораётган Ховоснинг ободлиги муҳташам уйлар, раво кўчалар, аҳоли фаровон яшаши учун яратилаётган қўллаб-қувватловчи намоён. Шу боис ховосликлар ҳақи равишда “Ховосим менинг – ҳавасим менинг”, деб гурурланишмоқда.

Лойиҳалаштирилган 30 та 900 хонадонли, 5 қаватли уйлар барвақт қуриб битказилди. 100 та ҳовлили уйлар қурилиши ҳам поёнига етказилди. 59 та арзон уй-жойларнинг 9 таси чин етимларга, 50 таси кам таъминланган оилаларга бепул тарқатилди.

“Ховос сити”да 315 ўринли замонавий мактаб ҳам бунёд этилганлиги янги кўчиб келганларга катта қулайлик туғдирди. Янги уйда яшаётган оилаларнинг фарзандлари шаҳарча ичида қад ростлаган илм масканида таълим олишмоқда.

Бу ерда юқоридаги қурилиш-

ХОВОС ҲАВАСЛИ ШАҲАРЧАГА АЙЛАНДИ



лардан ташқари, аҳоли ва меҳмонлар учун ҳам қўллаб-қувватловчи яратилмоқда. Жумладан, меҳмонхона, ҳаммом, савдо ҳамда хизмат кўрсатиш шохобчалари, китоб дўкони ва истироҳат боғи шулар сирасига киради.

“Ховос сити”да маъмурий бинолар қурилиши ҳам жадал давом эттирилмоқда. Ҳозиргача туман меҳнат ва бандликка кўмаклашиш

маркази, туман электр тармоқлари корхонаси маъмурий биноси қурилиб, фойдаланишга топширилди. Туман ҳокимлиги, ер тузиш ва кўчмас мулк кадастри, ички ишлар маъмурий бўлими, давлат солиқ инспекцияси каби ташкилотлар янги бинолари шаҳарча кўркига кўрк қўшиб турибди.

Янги йилда ховосликларнинг қувончи катта шодиёналарга

уланиб кетди. Бу ерда бир нечта йирик иншоот ва аҳолига хизмат кўрсатиш марказлари ишга туширилди. Ушбу тантаналарда вилоят ҳокими Ф.Мирзаев, Ўзбекистон Республикаси Президенти маслаҳатчиси Т.Худойберганов, вилоят, туман ва шаҳарлар секторлари бошлиқлари, маҳаллалар фаоллари, меҳнат фахрийлари ва оммавий ахборот воситалари

вакиллари иштирок этдилар.

Туманинг янги марказида “Хотира майдони” очилиб, қатнашчилар “Мотамсаро она” пойига гуллар қўйдилар. Эътиборли жиҳати, шу ерда 2700 йиллик тарихга эга бўлган 200 дан ортқ тарихий ашёлар ҳамда экспонатларни ўзида жамлаган Ховос ўлкашунослик музейи очилиб, фаолият кўрсата бошлади. Шунингдек, шаҳарчага ўзгача хусн бахш этиб турган Халқ қабулхонаси, Давлат хизматлари агентлиги, ФХДБ бўлими ҳамда Давлат хизматлари маркази маъмурий бинолари тантанали руҳда фойдаланишга топширилди. Давлат хизматлари марказида тўйларини бўлаётган учта келин-куёвга кўпчилик иштирокида никоҳ гувоҳномалари берилди. Ушбу хизматларни ўз ичига олган бино қурилишига 5 миллиард 326 мил-

лион сўмлик маблағ сарфланди.

Энг қувонarliси, янги ишга туширилган “Коворкинг маркази”да ёшларнинг бизнес ташаббуслари, ёлларини, лойиҳалари, ноу-хауларини, стартапларини амалга ошириш, уларни қўллаб-қувватлаш, юридик ва тижорий маслаҳатлар бериш, бухгалтерия ҳисоботларини юритиш, мастер-класслар ўтиш, семинарлар ташкил этиш учун барча қулайликлар яратилган. Марказ ишга тушиши ҳисобига 10 нафар ёш домий иш ўрнига эга бўлди. “Коворкинг маркази” қурилишига 1 миллиард 400 миллион сўм маблағ сарфланган.

Олиб борилган қурилиш, ободонлаштириш ва кўкаламзорлаштириш ишлари мамлакатимизда кўз-кўз қилса арзийдиган яна бир намунали, замонавий, энг гўзал манзил бунёд бўлганидан дарак беради. Бир сўз билан айтганда, бу ерда худди эртақлардагидек ажойиб мўъжиза, қадимий Ховоснинг янги тарихи яратилмоқда.

**Бозорбой БЕКМУРОДОВ,
“Qishloq hayoti” муҳбири.**

ЯХШИЛАРДАН ҚОЛУР МУДОМ ЯХШИ НОМ

Хоразм вилояти

Жайхун соҳилида

БЎСТОН ЯРАТГАН



ҚОНУН БАРЧАГА БАРОБОР

Ернинг талон-тарож қилинишига йўл йўқ

Мамлакатимизда аҳолининг сифатли қишлоқ хўжалиги маҳсулотларига бўлган эҳтиёжини қондириш, қолаверса озиқ-овқат хавфсизлигини таъминлашда ердан унумли фойдаланиш, талон-тарож қилинишининг олдини олиш муҳим аҳамият касб этади.

Шуни эътиборга олган ҳолда Ўзбекистон Республикаси Вазирлар Маҳкамаси ҳузуридаги Агротехнология ва ҳўжалиқ саноати вазирлиги инспекцияси вилоят бошқармаси ходимлари қишлоқ хўжалиги корхоналарига ажратилган ер ресурсларидан самарали ва оқилона фойдаланиш бўйича мунтазам назорат тадбирлари ўтказмоқда. Маълум бўлишича, жойларда қонун бузилиши ва ўзбошимчилик билан ерларни эгаллаб олиш ҳолатлари учраб турибди. Ўтган йили агроинспекция томонидан ўтказилган текшириш ва мониторинг назорати тадбирларида жами 3663 гектар қишлоқ хўжалигига мўжалланган ерлар ўрганилиб, 769,7 гектар ер майдонларида қонун бузилиш ҳолатлари аниқланган. Назорат тадбирлари давомида жами 312 та ҳолатда маъмурий қарорлар қабул қилиниб, 94,3 миллион сўм маъмурий жарималар қўлланган. Мазкур қонун бузилиш ҳолатлари бўйича давлат бошқаруви органлари, жисмоний ва юридик шахсларга 134 та огоҳлантириш хатлари, 16 та кўрсатма, 11 та тақдирнома киритилган. 83 та қонун бузилишлар юзасидан қонуний қўриб чиқиш учун ҳужжатлар судларга ва 1 та ҳолатда вилоят прокуратурасига юборилди. Бундан ташқари, Ер кодекси ижроси бўйича ўтказилган мониторинг-таҳлил тадбирлари давомида ерларни ноқонуний қишлоқ хўжалиги муомаласидан чиқариш ҳолатлари ҳам аниқланди. Жумладан, “Атхам Абдимўмин” МЧЖ раҳбари ўзбошимчилик билан эгаллаб олинган 1,5 гектар ер майдонининг қишлоқ хўжалиги муомаласидан чиқишига йўл қўйган. Бунинг натижасида катта миқдорда давлатга зарар етказилган. Ушбу ҳолат юзасидан қонуний чора кўриш учун тўлланган ҳужжатлар Сайхунбод тумани маъмурий судига юборилган.

Айтиш жоизки, соҳа мутахассислари томонидан ерга оид қонун ва меъёрий-ҳуқуқий ҳужжатларнинг изчил ижросини таъминлаш, уларнинг мазмун-моҳиятини кенроқ тушунириш бўйича жойларда мунтазам тарғибот тадбирлари ўтказилмоқда. Натижада аҳолининг ер ресурсларига бўлган муносабати ўзгарапти. Энг муҳими, деҳқон ва фермер хўжалиқларида ердан самарали фойдаланиш, уларни муҳофаза қилишга бўлган масъулият янада ошмоқда.

Ғиёсиддин УСМОНОВ,
“Ўзгагроинспекция” Сирдарё вилояти бошқармаси ахборот хизмати раҳбари.

Қирқ йилга яқин Хоразм телерадиокомпаниясида телеоператорлик қилган, Хоразмнинг Питнагидан тортиб, Гурланигача бўлган масофани неча марта қанча одамлар билан мулоқотда бўлган Ҳамиджон Маткаримов маърифатли инсонлардан эди. Хоразмнинг тирик тарихи дея эътироф этишарди. У гурунларимизнинг бирида Ўзбекистон Қаҳрамони, собиқ “Боғот” савхозининг машхур раиси Машариф Қувоқов ҳақидаги хотираларини шундай ўртоқлашган эди:



Бир пайтлари ўзим тасвирга олган тасмаларни кўрсам, хаёлимда ўша давр воқеалари жонлангандай бўлади. – деган эди Ҳамиджон оға. – Фаолиятим давомида кўплаб яхши инсонлар билан учрашдим. Ҳозир хотирламоқчи бўлганим Ўзбекистон Республикасининг биринчи Қаҳрамонларидан бири, деҳқончилик соҳасининг билимдон, ҳурматли инсон Машариф ака Қувоқовдир. Машариф ака оддий, камтарин, самимий, ишбилармон инсон эди. Суҳбатлашиб қолгудек бўлсангиз, чин юракдан мулоқотга киришарди. Машариф ака билан дастлаб 1984 йилнинг баҳорини танишганимиз. Хўжалигида экиш кезлари, ишлар авжида, деҳқоннинг қўли қўлига тегмайди. Қишлоқ ичкарасига киришингизда йўлнинг икки томонидаги манзарали ва мевали дарахлар баҳор шамоллида шовуллайди. Дала бошида хўжалик раҳбари Машариф аканинг машинаси кўринди. У дала чеккасида турган сепкага чигит солиб турган одамлар билан суҳбатлашиб,

ёрдам бера оласизми, деб сўради. Мен иккиланмай, бажонидил дедим. Ундай бўлса, Ҳамиджон ука сиз тасвирларни жамланг ва яхши китоб ёзадиган ёзувчи топинг, кейин менга хабар берарсиз, деди. Узоқ йиллар телевидения соҳасида ишлаган, бир қанча публицистик китоблар муаллифи, устозим Қодир ака Матчонов билан йўлга тушдик ва бир ярим соатларда манзилга етдик.

Машариф ака устозга ўзи яшаб турган уйдан бир хона ажратиб бериб, кечиктирмай ишга киришишни тайинлади. Устоз қишлоқда қолиб, китоб ёзишга киришди. Бир йилдан кейин “Жайхун соҳилидаги бўстон” деб номланган китобнинг тақдими бўлди. Хўжалик ташкил қилинган куннинг тантанали маросимига видеофильм ҳам тайёр бўлиб қолди. Шу орада Машариф Қувоқов мендан видеофильмни инглиз тилига таржима қилиб бўладими, деб сўраб қолди. Мен таржимон изладим ва ниҳоят топдим. Уни УрДУ талабаси Зокир Эшчонов зўр маҳорат билан таржима қилди. Инглиз тилига таржима қилинган бу фильм намойиши вақтида университет ўқитувчилари ҳам иштирок этиб, таржимани ижобий баҳоладилар.



Тошкент вилояти

Нурафшон ёшлар медиа-студияси ташкил этилди

Нурафшон шаҳрида жойлашган Ёшлар маркази биносидан “Нурафшон ёшлар медиа-студияси” иш бошлади. Шу муносабат билан ташкил этилган тадбирда Тошкент вилояти ҳокимлиги масъуллари, Ёшлар ишлари агентлиги вилоят бошқармаси, Ўзбекистон ёшлар иттифоқи вилоят кенгашлари вакиллари, “МУ5” телеканали ижодкорлари ва ёшлар иштирок этди.

Мазкур ташаббус вилоят ҳаёти, жумладан, ёшлар масалаларига оид телекўрсатувлар, турли эшиттиришлар, ёш журналистлар тайёрлашда амалий мактаб бўлиши алоҳида таъкидланди.

Мазкур медиа-студияни ташкил этиш учун ташкилотчилар томонидан 500 миллион сўм, хусусан, Тошкент вилояти ҳокимлиги томонидан ҳам махсус техникаларни олиш учун 300 миллион сўм маблағ ажратилди. Бунинг натижасида таъмирлаш ишлари олиб борилиб, зарур техник жиҳозлар билан таъминланди.

Шунингдек, бевосита журналист ва блогерларни тайёрлаш мактаби фаолиятини йўлга қўйиш мақсадида махсус ўқув хонаси ҳам ташкил этилди. Бу ерда икки нафар ўқитувчи, 3 нафар мутахассис иш фаолиятини бошлади ва ўқув жараёнида ёшларга сабоқ беради.

Студияда тайёрланадиган барча телелавҳалар, кўрсатув ва бошқа журналистик лойиҳалар “Ёшлар” ва “МУ5” телеканаллари орқали эфирга узатилади.

ЎЗА

Бухоро вилояти

Жаҳон чемпионлари етишиб чиққан қишлоқда спорт мактабининг замонавий биноси фойдаланишга топширилди

Бухоро туманидаги “Работи Қалмоқ” маҳалла фуқаролар йиғинидан ўнлаб чемпионлар етишиб чиққан. Бу ўринда жаҳон чемпионлари Собир Қурбонов, Шўҳрат Очилов, Ақобир Қурбонов номларини эслашнинг ўзи кифоя.

Янги йил шукуҳи кезиб юрган шу кунларда мазкур ҳудуддаги болалар ва усмирлар спорт мактабининг уч қаватли замонавий биноси фойдаланишга топширилди. Унинг қурилиши учун давлатимиз томонидан 4 миллиард сўм маблағ сарфланди. — Маскандан ёшларимиз

спортнинг 12 та тури билан шуғулланиш имкониятига эгалар, — дейди самбо бўйича 1989 йилда бўлиб ўтган жаҳон чемпионати ғолиби, Халқ депутатлари Бухоро вилояти кенгаши депутати Шўҳрат Очилов. — Шунинг 9 таси олимпиада спорт тури саналади. Лойиҳага мувофиқ, 120

ўринли шинам меҳмонхона ҳам барпо этилгани янги иншоотнинг афзал жиҳатларидан бири бўлди. Бу республикамизнинг турли гушаларидан мусобақага иштирок этгани ёки ўқув – машғулоти ўтказгани келган спортчиларга қулайликлар яратади.

Янги иншоотни фойдаланишга топшириш муносабати билан ўтказилган тантанали маросимда самарали фаолият кўрсатаётган бир гуруҳ мураббий ва спортчилар қимматбаҳо совғалар билан тақдирланди.

Истам ИБРОҲИМОВ

Жиззах вилояти

СУВ ТЕЖОВЧИ ТЕХНОЛОГИЯЛАР КЕНГ ЖОРИЙ ҚИЛИНАДИ

Жиззахда 5 январь кун суви тежайдиган технологияларни жорий этишни кенгайтириш бўйича республика кўргазмали амалий семинари бўлиб ўтди.

Унда Қорақалпоғистон Республикаси Вазирлар Кенгаши раисининг, вилоят ҳокимларининг қишлоқ ва сув хўжалиги масалалари бўйича ўринбосарлари, тегишли вазириқлар, идоралар ҳамда тижорат банклари раҳбарлари, сув тежовчи технологияларни ишлаб чиқарувчи хорижий ва маҳаллий корхоналар, агрокластерлар, фермер хўжалиқлари ва оммавий ахборот воситалари вакиллари қатнашди.



Семинар иштирокчилари дастлаб Пахтакор туманидаги “Жавлонбек” фермер хўжалиги далаида лазер ускунаси ёрдамида ер текислаш, дискрет усулида суғориш жараёни билан танишдилар. Шундан сўнг Шароф Рашидов туманидаги “Тилов бобо” ва “Бек” фермер хўжалиқларида

томчилатиб ҳамда ёмғирлатиб суғориш технологияларини жорий этиш натижалари ҳақида батафсил маълумот берилди.

Вилоят ҳокимлиги мажлислар залида ўтказилган семинарнинг назарий қисмида Ўзбекистон Республикаси Президентининг 2020 йил 11 декабрда қабул қилинган



“Қишлоқ хўжалигида суви тежайдиган технологияларни жорий этишни янада жадал ташкил этиш чора-тадбирлари тўғрисида”ги қарори ижросини таъминлаш, белгиланган чора-тадбирларни амалга ошириш билан боғлиқ вазифалар атрофлича муҳофаза этилди.

Шунингдек, маҳаллий корхоналар томонидан ишлаб чиқарилаётган суви тежайдиган технологияларнинг бутловчи қисмлари намойиш қилинди.

Семинарда Ўзбекистон Республикаси Бош вазирининг ўринбосари Ш.Ғаниев, Сув хўжалиги вазири Ш.Хамраев, Жиззах вилояти ҳокими Э.Салиев сўзга чиқди.

Сирдарё-Зарафшон ИТХБ матбуот хизмати.

Ҳақиқат фикрлар тўзғоғидан, баҳс-мунозаралар қуюнидан пайдо бўлади.



Мустақилликка эришганимиздан сўнг барча соҳаларда бўлгани каби республика қишлоқ хўжалигида ҳам ислохотлар бошланди. Бу ислохот тизими ҳозирги кунда ҳам шиддат билан давом этмоқда.

|| ҚИШЛОҚ ҲАЁТИДАН ЛАВҲАЛАР

Ислохотлар...

Амалиётлар...

Хулосалар...

Таклифлар...

Мен қишлоқ хўжалиги мутахассиси, ўрта бўғин кадрлари бўлганим учун ҳам шу жараёнинг ичида ҳам иштирокчи, ҳам ижрочи сифатида фаолият юргизиб келмоқдаман. 1971 йилдан бошлаб колхоз ва совхозда, район қишлоқ хўжалик бошқармасида бош агроном, ширкат хўжалигида раис вазифаларида ишладим. Ўзим ишлаган ширкат ташкил этилган “Тугатиш комиссияси” ширкат хўжалик идораси залида эндигина иш бошлаган ҳам эдики, залга туман ҳокими кириб келди. У ўтирмади ҳам. Тикка турганича менга мурожаат қилди: “Ишни ўзингиз бошқарасиз!”, дедида мени имлаб чиқиб кетди. Мен ҳам ташқарига чиқдим.

Ҳокимнинг кутилмаганда бундай қарорга келишининг сабаби вазият тақозоси эди. Ширкат хўжалигимиз Марказий Фарғона ерларида жойлашган. Ер сўраб тушган аризалар сони 200 дан ортиқ эди. Аризачиларнинг ҳаммаси қишлоқ яқинида жойлашган 4 та бригадага қарашли 400 гектарга яқин, анча ишга келиб қолган ерлардан эди. Минг гектардан зиёд чўл ичкарига кириб кетган ерлардан олишни ҳеч ким, ҳаттоки ўша ерларда ўзи бригада бошлиғи бўлиб ишлаганлар ҳам хоҳламади. Бунинг устига ерни аҳолига бериш илк бор бўлаёпти, бунинг механизми ҳам йўқ. Пахта ичида суяги қотган миришкорларни ер олишга

даъват этдим. Улар яқинларига ҳам йўлатишмади. “Оч қорним – тинч қулгим” дейишди.

Хўжалигимиз фермерликка ўтаётган тумандаги биринчи хўжалик эди. Ер сўраганларнинг бир қисми умрида далани кўрмаган, қўлига кетмон ушламаган, “ёзувчи” номи билан танилган, қолганлари ҳар-хил тоифадаги мутахассислар, идора ва техника ходимлари эди.

Туман раҳбари машинасининг олдида етганда тўхтаб, менга юзланди:

– Ўзингиз қайси ерни олсангиз?
– Мен ер олмайман, – дедим, уни маҳтал қилмай.
– Нега, тўртта ўглингиз бор... – деди, мендан буни кутмаган раҳбар.

– Агар мен ер олсам... 200 та аризага ер топиб беришимиз керак...

Нигоҳларимиз узилмай туриб ҳокимдан рухсат сўраддим.

– Ерни 30 кишига тарқатаман. Ўн беш гектардан. Шулардан 5-6 таси ўзингиз билган муттаҳамлар...

– Худо мададкор бўлсин!
Ҳоким кўлимни сиқиб, машинасига ўтирди.

Бу ўша давр тақозо этган “қонуният” эди. Раҳбарнинг дабурустдан келиб, комиссия ишини ислох қилишига сабаб комиссия раисининг ўзи эди. У 200 та аризага ер етмаслигини билгач, ваҳимада қолди. Ўша даврда биринчи вариантдаги кўрсатмаларда аввалги битта бригада ўрнида битта фермер хўжалиги ташкил топиши керак эди. Бу дегани янги ташкил топаётган фермер хўжалигининг ер майдони 60-70 гектар бўлиши керак, дегани эди. Ваҳимада қолган комиссия раиси ҳокимга телефон қилиб, вазиятнинг ўта қалтислигини, тарқат

тиладиган ер майдони аризаларнинг 10 фоизига ҳам етмаслигини, ҳокимнинг ўзи келмаса бўлмаслигини айтиди. Ўзи доворак, чўртқесар ҳоким тумандаги шикоят юқорига етиб боришдан ўтакаси ёрилди. Ҳокимни кузатиб, сукут ва сукунатда қолган оломон ичидан ўтиб залга кирдим. Комиссия аъзолари хайкалдек ўтиришарди. Менга бўшатиб қўйилган стулга ўтириб, аввалдан ўйлаб қўйилган 30 кишининг рўйхатини ёздим ва аризаларнинг залга киришларини буюрдим. Ер олиш учун рўйхатга киритилган 30 кишининг исм-фамилиясини ўқиб эшиттирдимда, комиссия ишини яқунлади, ҳаммага жавоб, дедим. Залда сукунат. Хонани тарқатётган одамларнинг судраб босаётган оёқ товушлари эшитиларди холос. Энг охири одам зал эшигидан чиқар экан, комиссия аъзоларидан бирининг овози янгради: – “Булар эканку!”

Фермер хўжаликлари ташкил топаётган дастлабки йилларда фермер хўжалиги ер майдонининг мақбул варианты 60-70 гектар қилиб белгиланган эди. Вазият тақозоси билан бунинг имкони бўлмасди. Айтиб ўтганимиздек, 15 гектарлик фермер хўжаликлар ташкил топди. Вақт ўтиб, ўша фермерлар бирлашиб, 60-70 гектарлик, ҳатто ундан ҳам йирик хўжаликлар пайдо бўлди. Фермер хўжаликларини ташкил қилишдаги иккинчи талаб бўлажак фермерни танлаш эди. Раҳбарлар маълумотли агроном, фермер хўжалиги моддий техника базасини яратишга қурб етадиган одамлардан танланиши керак эди. Бу соҳада ҳам маҳаллий вазият тақозоси устуворлик қилиб, юқоридагидек ҳолатлар юз берди. Маълумотли мутахассислар, миришкорларнинг аксарияти ер олишни хоҳламаганларидек, умрида даланинг юзини кўрмаган одамлар ерга эга бўлди. Уларнинг айримларидан ўтган давр ичида халос бўлди. Айримлари афсуски, ҳозир ҳам қолақ фермерлар рўйхатини тўлдириб юрибди...

Бундан буён қишлоқ хўжалиги истиқболини режалаштирар эканмиз, босиб ўтилган, эндиликда тарихга айланиб, орқада қолган машаққатли йўлни чуқур таҳлил қилмоғимиз керак. Зеро, ҳақиқат фикрлар тўзғоғидан, баҳс-мунозаралар қуюнидан пайдо бўлади.

Биз фермерлик ислохотлари бошланганидан буён кўзлаган мақсадимизнинг биринчи босқичига эришдик, фермерлик мактабини яратдик. Халтачада муҳр, қўлида папка идорама-идора тентиб юрган номигагина фермерлар ўрнида босган қадамни билиб ташлайдиган, тadbirkor фермерлар жамоаси пайдо бўлди. Ўз ишининг мутахассиси бўлган фермерлар синфига эга бўлдик. Яқин йиллар олдин аксарият фермерлар ўз тасарруфларидаги ерларга режада белгиланмаган экинларни экиб, “Ер меники, пахта, дон сотиш режаларини бажарсам бўлди”, деган нотўғри фикрда юрарди. Бугунги кунга келиб бундай ҳолатлар онда-сонда учрайди.

Биз фермерлар сулопасининг тўғри авлодида қонун устуворлигига эришдик. Эллик фоиздан ортиқ фермер хўжаликларимизнинг моддий техника базаси мустаҳкам. Бундай фермерлар эл орасида обр-этиборга, нуфузга эга.

Абдусалом АҲМАДАЛИЕВ

Фарғона вилояти Олтиариқ тумани

|| ҚАҲРАТОН ҚИШ МЎҶИЗАСИ



Ўлкамизга ҳукм сураётган қиш фрасли оғатгазиган анча совуқ келгани боис, буладуруқ ҳодисаси кузатишмоқда.

Сурхондарё вилояти

Миллий гвардиячилар ёшлар ўртасида ватанпарварлик ва соғлом турмушни тарғиб қилмоқда

Ўзбекистон Республикаси Миллий гвардияси Сурхондарё вилояти бўйича бошқармаси вилоят қўриқлаш бошқармаси ҳамда маҳаллий ҳокимликлар ҳамкорлигида Куролли Кучларимиз ташкил этилганининг 29 йиллиги ва Ватан ҳимоячилари кун муносабати билан чекка ҳудудлардаги умумтаълим мактабларида турли маданий-маърифий тадбирлар ташкил этмоқда.

Ана шундай тадбирлардан бири Олтинсой туманидаги 13-умумтаълим мактабида бўлиб ўтди.

Чекка “Мустақилликнинг 10 йиллиги” маҳалласи ҳудудида жойлашган таълим муассасасида осойишталигимиз посбонлари ўқувчи-ёшларга мамлакатимизда навқирон авлодни ҳар тарафлама соғлом камолга етказиш борасида амалга оширилаётган ишлар ҳақида атрофлича маълумот берди. Ўзбекистон Республикасининг “Ёшларга оид давлат сиёсати тўғрисида”ги Қонуни, Президентимиз томонидан илгари сурланган бешта муҳим ташаббус, “Ёшларни қўллаб-қувватлаш ва аҳоли саломатлигини мустаҳкамлаш” йилининг мазмун-моҳияти хусусида фикр алмашди.

“Ватанпарварлик ойлиги” доирасида ўтказилган тадбирда спортнинг шахмат-шашка, қураш турлари, шунингдек, “ким эпчил-у, ким чаққон”, “қувноқ стартлар” каби қизиқарли мусобақалар ташкил этилди. Голиблар медал ва эсдалик совғалар билан тақдирланди. Осойишталигимиз посбонларининг қўл жанги бўйича кўргазмачи чиқишлари ва замонавий қурол-аслаҳалар кўргазмаси ўқувчиларнинг ҳарбий хизматга қизиқишини янада оширди.

Тадбир якунида Миллий гвардиячилар тумандаги 13- ҳамда 2- умумий ўрта таълим мактаблари ўқувчиларига бир дондан компьютер жамланмасини тўхфа қилди.

Бугун мазкур тадбир воҳанинг чекка ва тоғли Сароисё туманида давом этмоқда.

Холмўмин МАМАТРАЙИМОВ, Ўза

Qishloq hayoti

МУАССИСЛАР:
Ўзбекистон Республикаси
Вазирлар Маҳкамаси таркибидagi
ҳамда бошқа дахлдор
вазирлик ва идоралар.

Бош муҳаррир:
Чори ЛАТИПОВ

Ҳабиб ТЕМИРОВ
(Бош муҳаррир ўринбосари)

Раимқул СУЯРОВ
(Бош муҳаррир ўринбосари)

Саҳифаловчи-дизайнер: **Марк ЮСУПОВ**

ТАҲРИР ҲАЙЪАТИ:
Жамшид ХУҲАЕВ,
Шавкат ҲАМРОЕВ,
Шухрат ТЕШАЕВ,
Мухаммадҷон ТОШБОЛАЕВ,
Ақтам ҲАЙТОВ,
Ботир СУЛАЙМОНОВ,
Маҳмуд ТОИР.

Ўзбекистон Матбуот ва ахборот агентлиги томонидан 2009 йил 13 февралда № 0020-рақам билан рўйхатдан ўтказилган. Буюртма Г-147, ҳажми 2 босма табоқ. Офсет усулида босилди, қоғоз бичими А-2.
Манзил: 100000, Тошкент, Матбуотчилар кўчаси, 32-уй.
3 798 нусхада чоп этилди. НАШР ИНДЕКСИ – 144.

Телефонлар: Қабулхона – 236-26-50. Аграр масалалар бўлими – 236-26-47. Хатлар ва жамоатчилик билан алоқалар бўлими – 233-76-78. Факс – 233-44-43, 233-09-93. Реклама ва эълонлар – 236-26-50, 233-28-04. e-mail: info@qishloqhayoti.uz

Газета “Шарқ” нашриёт-матбаа акциядорлик компанияси босмаҳонасида босилди.
Манзил: “Буюк Турон” кўчаси, 41-уй. 1 2 3 4 5 6

Баҳоси келишилган нарҳда.

ISSN 2010-7021



Босишга топшириш вақти: 21.00
Босишга топширилди: 21.20

АЗИЗ ЮРТДОШЛАР!

Мамлакатимизда амалга оширилаётган ижтимоий-иқтисодий ислохотлар, хусусан, қишлоқ жойлардаги улкан бунёдкорликлар, одамлар онгу тафаккуридаги ўзгаришлар, қишлоқ ҳаётининг жонли манзаралари билан танишиш истагида бўлсангиз,

“Qishloq hayoti”

ГАЗЕТАСИГА
ОБУНА БЎЛИШГА ШОШИЛИНГ!

Бунинг учун обуна уюштирувчи ташкилотларга, шунингдек, таҳририятнинг ўзига ҳам мурожаат этишингиз мумкин.

НАШРИМИЗ ИНДЕКСИ – 144

МУРОЖААТ УЧУН ТЕЛЕФОНЛАР:
236-26-50, 233-44-43, 233-28-04.

ФАКС: 233-44-43. E-mail: info@qishloqhayoti.uz